

SCRIPT OF MORNING GOJRI NEWS BULLETIN 30AUG 1015 HRS

مارننگ گو جری نیوز بلیٹن مورخہ 30 اگست 2025

یوہ آکا شوانی جموں ہے باغ علی طاہر تیں خبر سُنو۔

CLOUD BURST RAMBAN

ضلع رام بن غی راج گڈھ تحصیل مانہہ اج بدل پھٹن غا اک واقع سنگ 3 افراد ہلاک جد کہ 2 دوجا لاپتہ ہو گیا ہیں رام بن غا ایڈیشنل ڈپٹی کمشنر ورون جیت چاڑک نے اس بارے جانکاری دیتا وں دسیو ہے جے گزشتہ رات غا 12 بجے غے قریب تھسیل راج گڑھ غا دروپدا گراں مانہہ یوہ واقعو پیش آيو اُنہاں نے دسیو ہے جے اطلاع ملتاں ہی ایس ڈی آر ایف پولیس تے سول انتظامیہ موقع ور پُجیا تے لاپتہ افراد نانہہ تلاش کیو جارہیو ہے۔ اُوں ریاسی ضلع غا ماہور علاقہ مانہہ بدل پھٹن غا اک ہور واقع مانہہ 7 افراد غا ہلاک ہوجان غی وی خبر موصول ہوئی ہے۔

LG COMMITTEE

لیفٹیننٹ گورنر منوج سنہا نے کل اک 3 ممبری کمیٹی تشکیل دتی ہے جہڑی ضلع ریاسی مانہہ ماتا ویشنو دیوی غی گفہ در جان آلا رستہ تریکوٹہ پہاڑیاں ور زمینی تودا آجان غی وجہ غوپتو لاوے گی جس غی زد مانہہ آغے کیہ یاٹری اپنی جان گنوا بیٹھا تھا جدکہ کئی دوجا زخمی ہو گیا اس تحقیقاتی کمیٹی غی قیادت ایڈیشنل چیف سیکرٹری محکمہ جل شکتی کریں گا جس مانہہ جموں غا ڈویژنل کمشنر تے آئی جی پی جموں کمیٹی غا ممبر وین گا یاہ کمیٹی 2 ہفتاں غے اندر اندر اپنی رپورٹ لیفٹیننٹ گورنر نانہہ پیش کریں گی جہڑا ماتا ویشنو دیوی شرائین بورڈ گا چئیرمین وی ہیں۔

RANA ST SCHOLARSHIP

قبائلی امور محکمہ گا وزیر جاوید احمد رانا نے شیڈیول ٹرائیب طالب علماں نانہہ قبائلی معاملن غی مرکزی وزارت غا طے شدہ رہنما سطور غے مطابق ولے سر وظیفہ مہیا کرانگا اپنا وعدہ نانہہ فر دوبرایو ہے اُن غو کہنو تھو جے ایس ٹی ضمیرہ دو گا میٹرک تیں پہلاں تے میٹرک تیں بعد غی جماعتاں غا طالب علماں مانہہ وظیفہ تقسیم کیا جان بارے ضابطا محکمہ قبائلی امورگی طرفوں طے کیا جا چکا ہیں تے ان غی تقسیم مانہہ کسے قسم غی تاخیر نہیں کی جاسکتی جناب رانا نے محکمہ غا ڈائریکٹر تے سیکرٹری نانہہ ہدایت کی ہے جے وے بشمول ضمیرہ 2 تمام اہل ایس ٹی طالب علماں مانہہ فوری وظیفہ تقسیم کیا جنیں۔

RANA TOUR

جل شکتی محکمہ گا وزیر جاوید احمد رانا نے کل جموں گا سیلاب دہ علاقن بھر مینی گڈھا سراڈی بٹھنڈی سنجواں ت چاٹا علاقن غو دورو لاغے زمینی صورتحاک غو جائیزو لیو اُنہاں نے ات ریلیف تے باز آباد کاری کماں گو وی معائینو کیو اپن غے ہمراہ راجیہ سبھا غا ایم پی غلام علی کٹھانہ وی موجود تھا اُنہاں نے دونگی ہائر سکینڈری سکول غا ریلیف کیمپ گو وی دورو لایو جت سیلاب غی وجہ نال برمینی گراں تیں بے

گھر ہویا کئی خاندان مقیم ہے وزیر موصوف نے ان خاندانوں سنگ ملاقات کرے اُن
غی مشکلات وی سنی تے اُن غا ہر ممکن ازالہ غو یقین دوايو۔

SATISH KHOUR VISIT

نوجواناں غی خدمات ت کھیداں بارے محکمہ گا وزیر ستیش شرما نے کل کھوڑ سب
ڈویژن غا دھارکھو ہڑ چھنی داؤنو ٹھنگر تے سموان بلاک غو دورو لاغے حلیہ سیلاباں
سنگ پُجیا نقصان گو جائیزو لیو اُنہاں نے اپنا دورہ غے دوران متاثرہ افراد واسطے چل
رہیں ریلیف تے باز آبادکاری کماں گو وی معائینو کیو جناب شرما نے اس موقع ور متاثرہ
خانداناں سنگ ملاقات وی کی تے یقین دوايو جے سرکار اُن غی بہبود غی وعدہ بند ہے
وزیر موصوف نے بکھ بکھ محکماں گا عہدیداراں نانہ ہدایت کی ہے جے متاثرہ گنباں
نانہ اناج ایل پی جی تے دوجی ضروری چیزاں غی دستیابی نانہ یقینی بنايو جائے نالے
سڑک رابطاں تے ٹرابسپورٹ سہولتاں نانہ جنگی پیمانہ ور کم کرتاواں بھال کیو
جائے۔

SATISH SPORTS DAY

نوجواناں غی خدمات تے کھیڈاں بارے محکمہ غا وزیر ستیش شرما نے کہی وہے جے
قومی کھیڈ تہاڑو ہم نانہ نظم وضبط تے یکجہتی غی یاد کراوے اُنہاں نے اس گل غو
اظہار کل کے کے کے ہکو سٹیڈیم مانہ قومی کھیڈ تہاڑو غا موقعور منعقدہ اک تقریب
سنگ خطاب کرتاواں کہیو اس موقع ور ہاکی غا جادو گر کھیڈاری غا طور ور جانیہاں
آلا میجر دھیان چند اُن غا جنم تہاڑو ور یاد کیو گیو۔ اس موقع ور بولتاواں ستیش شرما نے
ک کہیو جے یوہ فخر غو مقام ہے جے جموں کشمیر غا ہر کونہ مانہ اس دن نانہ نایا
جان غی خاطر نوجوان شرکت کر رہیا ہیں اُن گو کہنو تھو جے ہم نانہ لگاتار نوجوان
کھیڈاریاں غی حوصلہ افزائی کرنی چاہیے تانجے زمینی سطح تیں ایسا چیمپین پیڈہ کیا
جاسکیں جہڑا ملک غوناں روشن کرن مانہ اپنو کردار ادا کرن غے قابل بن سکیں۔

NHW CLOSED

جموں سرینگر قومی شاہراہ ور گزشتہ 26 اگست نانہ ہوئی پاری بارشاں تے سیلابی
صورتحال سنگ بکھ بکھ جگہاں ور پسی آجان غا نتیجہ مانہ شاہراہ اج لگاتار پنجویں
روز وی بند ہے آکاشوانی جموں گا نمائندہ نے جاناگری دیتاواں دسیو ہے جے لما عرصہ
غا جام غی وجہ نال قومی شاہراہ ور 2 ہزار غے قریب گڈیاں پھسی وی این جس غی و
جہ نال بکھ بکھ ضلعان مانہ ایندھن ایل پی جی تاشہ سبزیاں تے دوجی ضروری چیزاں
بستاں غی قلت پیڈہ ہو گئی ہے قومی شاہراہ ادھمپور غا جکھینی ت چینی بشار کئی
مقامات ور گڈیاں گا جام سنگ متاثر ہوئی ہے تے سڑک بحالی غو کم اجیں مکمل نہیں ہو
سکیو ہے۔ ٹریفک بحالی غو کم اجیں مکمل نہیں ہو سکیو۔ ٹریفک عہدیداراں نے دسیو ہے
جے مغل سڑک تے سنتھن اننت ناگ شاہراہ لوہکی گڈیاں غی او جائی واسطے کھلی
وی ہے جد کہ جموں صوبہ غا کئی بین ضلعائی سڑک رابطاں اجیں وی زمینی توداں تے
سڑکاں نانہ آئی کھروچے غی وجہ نال بند این جس نال درجنان گرایاں غو لوکاں نانہ
مشکلات پیش آرہی ہیں۔

JMC WATER SUPPLY

لگاتار بارشاں غا نتیجہ مانہہ بکھ پانی سپلائی ذریعہاں نانہہ پُجیا نقصان سنگ جموں شہر غا کئی علاقہاں پانی غی سخت قلت پیدہ ہوگئی ہے لوکاں نانہہ پانی غی ضروری سپلائی مہیا کران غے پیش نظر جموں میونسپل کارپوریشن شہر غا بکھ بکھ علاقہاں مانہہ پانی سپلائی غو بندوبست کر رہی ہے کارپوریشن غا کمشنر ڈاکٹر دیوانس یادو جہڑا بزارت خود پانی سپلائی غا انتظامات غو معائنو کر رہیا ہیں تے اُن غے ہمراہ جموں مغربی اسمبلی حلقہ تیں ایم ایل اے ارونڈ گپتا وی موجود تھا لمشنر موصوف نے متعلقہ عہد یداراں نانہہ ہدایت کی ہے جے وے متاثرہ رہائشیاں نانہہ ولے سرپانی مہیا کران نانہہ یقینی بناویں۔

MELA PATT BHADERWAH

بھدرواہ غا پُرانا کھا کھل محلہ مانہہ کل تیں 3روزہ پٹ میلو شروع ہو گیو ہے آکاشوانی جموں گا نمائندہ نے دسیو ہے جے اس میلہ غی تاریخ نال ثقافت سنگ منشلک ہے جہڑی مغل بادشاہ اکبر ت بھدواہ غا راجہ ناگ پال غی ملاقات غی مظہر ہے یوہ میلو سولہویں صدی عیسوی تیں لگاتار مہیاو جارہو ہے اس سال وی اس میلہ مانہہ جموں کشمیر غا بکھ بکھ ضلعان تیں لوک بلا امتیاز مزہب وملت شرکت کر رہیا ہیں جہڑا ات راجا ناگ پال غی بہادری ت روحانی طاقت نانہہ خراج عقیدت پیش کر رہیا ہیں۔

AYUSH RAMBAN

ضلع رام بن غا سیلاب تیں متاثرہ افراد نانہہ امداد مہیا کرانغی لگاتار کوششاں غے تحت آیوش مہکمہ غی طرفوں سینکڑاں غی تعداد مانہہ متاثرہ گُنباں گا افراد مانہہ دوائیں تقسیم کی گئیں نالے مفت میڈیکل چیک اپ کیا گیا ضروری صحت سہولیات جن مانہہ ہنگامی علاج معالجو تے مفت طبی صلاح شامل ہی بکھ بکھ میڈیکل کیمپاں غے ذریعے متاثرہ خانداناں مانہہ مہیا کرائی جارہی ہیں اس توں علاوہ ان کیمپاں مانہہ ضروری طبی جانکاری وی متاثرہ افراد نانہہ مہیا کرائی جارہی ہیں جن مانہہ صفائی ستھرائی تے صاف پانی غی اہمیت نالے بیماریاں غی روک تھام تے ٹراما جیسی صورتحال تیں بچن غی ترغیب وغیرہ شامل ہیں۔
